



## Vita de ploania y de paisc

- **Le tru nò dla crejima:** jones y jogn nasciüs l'ann 2008 y i nasciüs l'ann 2009 co ará complí 16 agn cina le de dla Crejima, preodü por Pasca de ma 2025 (08.06.2025), é bel enviés da gní con geniturs, totes y toc y enteressés en **vendres ai 12 de ma ales 20:00 a Al Plan**, tal salf dla Raiffeisen, ala **sera d'enformaziun con Markus Felderer**, direttur dal ufize por la catechesa, sora le tru de preparaziun ala Crejima.
- **Le KVV d'La Pli** envieia al referat **“Le cör, en organ de morveia” en lönesc ai 8 de ma ales 20:00** te Ciasa dles Uniuns. Referent é le cardiologh **Dr. Felix Pescoller** co cuntará dal cör desco organ, söa funziun, les arteries coronares, le bot al cör ... Atenziun particulara ti gnará dé ala prevenziun. Düc é bel enviés.
- **La Joneza da Paur dla Pli** envieia der bel ei/eres, jogn/jones dai 16 agn ensö al **bal dla Joneza da Paur**, en **sabeda ai 13 de ma** ales 21:00 te Ciasa dles Uniuns. Te salf sarál i „Tiroler Herz“ co se crüziará dal entratenimont musical y por chi co á veia de musiga plü da sbunf sarál „DJ temptation x“. La Joneza da Paur s'enconforta da s'odei.



## Enformaziuns y termins

**Oraziun a Oies:** la proscima ora de oraziun la stöa dla ciasa de Sant Ojep a Oies, é en vendres, ai 12 de ma. Düc é bel enviés.

**La Uniun Ei Val Badia KMB** envieia düc i ei y i jogn ala prozesciun con linternes o cianderes (da se tó do) en **sabeda ai 13 de ma, dales 21:00, da Porsenú a Neustift**. I piun ia dal Vinzentinum y jun a Neustift olach'al gnará zelebré na messa con le vesco Ivo Muser. Al vá ia na coriera aposta co passa a Longega ales 19:30. I enteressés é periés da s'anunzié pa Leo Crepaz, ☎ 348 40 96 351 cina en dedolönesc, 10 de ma.

**La Ciamena dal quant** sará ennant daverta por se chirí fora quant, mo al ven perié da ne porté nia plü quant dala fin de ma ennant, deache la Ciamena dal quant messará plü ennant proé da se chirí n'atra sonta. Sce zacai ess local adatés da meter a desposiziun, éesai der bel periés da se lascé adentene. Plü ennant gnará lascé alessei desche ara vá ennant.

**Ocio - Comune de Mareo:** al ven lascé alessei che dal lönesc ai 15 de ma cina ala jöbia ai 18 de ma vegnel fat laurs pa la condüta dal'ega Prades - Longega. L'ega ven garantida da doman y da sera. Al gnará parti fora por les ciasas enteresciades na zetola con les enformaziuns.

**L'Uniun dles Eres d'Al Plan** organiseia na „spazirada por emparé da conesce les erbes“, deboriada con l'esperta de erbes Margareth de Pincia. An s'encunta en jöbia ai 18 de ma dales 16:00 ales 18:00. Al é da se iestí de bogn cialzá. Enformaziuns y prenotaziuns anter i 12 de ma pa Michi, ☎ 348 7589255.

**L'ASC Mareo/Raiffeisen** envieia ala sontada generala co ven tignida en lönesc ai 8 de ma ales 20:00 tal salf dla Cassa Raiffeisen a Al Plan.

**Döt le bun a:** Maria Willeit Comploi, *La Ila* \* 07.05.1942  
Irma Daporta Barth, *Graz* \* 13.05.1923  
y a düc chi co á santennom y complesc i agn cöst'edema

**Impressum:** Ploania d'La Pli; redaziun Franz Rigo y Edith Willeit  
**Comunicaziuns:** cina le **dedemesaledema** sera a Franz Rigo, ☎ 347 2310129 o ✉ ploania@gmx.net  
**Download plata:** [www.unitepastorala.org](http://www.unitepastorala.org)



# Plata dla Ploania La Pli de Mareo Santa Maria dal Bun Consei

Ploan: Signor Klaus Sottsas  
✉ [klsottsas@rolmail.net](mailto:klsottsas@rolmail.net)

Calogna Al Plan: ☎ 0474 501006  
Radio de Ploania: 93,00 MhZ

UNITÉ PASTORALA



**VAL BADIA**  
[www.unitepastorala.org](http://www.unitepastorala.org)

Ann A

07.05.2023 - Cuinta domegna de Pasca

n. 24

## Iu sun le tru, la verité y la vita. Degügn ne róa dal Pere ater co tres me. Alleluia.

(aclamaziun dan le Vangelo)

☞ **St.Ap 6, 1–7 | 1 Pire 2, 4–9 | Jan 14, 1–12**

*Chi co ponsa che la Dlijia dai pröms tomps ne n'ái nia albü dificoltés, se fala. Ara nen jea enlaota por la dljia da tó la derta strada te söa misciun sön la tera. Tla Storia dai Apostui nes vegnel cunté desche cösta comunité cristiana nea, la “Dlijia”, gnea tres plü grana y co ch'ara á belo enlaota salpü da organisé sū sorvisc co jea debojügn, desco la lita dai diacons (1<sup>a</sup> letöra). La condiziun nea de vita da cristians nes ven portada a coscionza ince da san Pire co dij ch'i sun na “generaziun cherida fora, na naziun santa”, mo co se sont gonot foresta te so daciasa, te cösc monn (2<sup>a</sup> letöra). Porchel dij Gejú a sū discepui da ne ester nia grams; y al ti empormet so daciasa, na abitaziun pa so Pere. El enstes, Gejú, é la strada co condüj enló, y al n'é degüna atra strada co porta al Pere (Vangelo). da “Bibia di Sandís”*

### Dal Vangelo do San Jan:

Te chel tomp á Gejú dit a sū discepui: <sup>1</sup>Osc cör ne se lasci nia turbé. Cherdede te Dio y cherdede te me!  
<sup>2</sup>Tla ciasa de mio Pere él trepes abitaziuns. Sc'ara ne foss nia ensciö, ves essi dit danló: I va a ves arjigné ca n post? <sup>3</sup>Canch'i sarun jü y ves ará arjigné ca n post, vegni endò, y i ves condüji da me, por ch'i seise ince os, olache iu sun. <sup>4</sup>Y olache iu va – chel tru conesceise pö. <sup>5</sup>Tomesc ti á dit: Signur, i ne sán nia olache te vas. Co desson pa spo conesce le tru? <sup>6</sup>Gejú ti á dit: Iu sun le tru y la verité y la vita; degügn ne róa dal Pere ater co tres me. <sup>7</sup>Canch'i m'areis conesciü, conesciareise ince mio Pere. Belo sen le conesceise y l'eise odü. <sup>8</sup>Filípus ti á dit: Signur, móstresse le Pere; cösc nes basta. <sup>9</sup>Gejú ti á respognü: Belo tan dio sunse pa os, y te ne m'as nia conesciü, Filípus? Chel co á odü me, á odü le Pere. Cò sciafieste pa da dí: Móstresse le Pere? <sup>10</sup>Ne creieste nia, che iu sun tal Pere y che le Pere é te me? [...]



**Gejú ti á dit: Iu sun le tru  
y la verité y la vita;**  
Jan 14, 6

☞ **Letöres dla Sesta domegna de Pasca:**

**St.Ap 8, 5–8.14–17 | 1 Pire 3, 15–18 | Jan 14, 15–21**

## Edema liturgica dai 07.05. ai 14.05.2023

<b>DOM 07.</b>	<b>Cuinta domegna de Pasca</b>	<i>Gisela</i>
→ 09:15	<p><b>prozesciun</b> a Curt, enló 1 en vangelo y  <b>s.m.</b> en onú de San Florian do int. dai Stödafüs d'La Pli y d'Al Plan  <b>s.m.</b> por † Alma Obojes Willeit, Plazores <span style="float: right;">♪ <i>Musiga d'La Pli</i></span>  <b>s.m.</b> por †† Vigile y Maria Comploi, Möra  <b>s.m.</b> por † Monica Peslalz Rabbú, Tlea/Genova</p>	
<b>Lön 08.</b>	<i>beata Ulrika Nisch, Friedrich, Ulrich, Desiré</i>	
19:30	<p><b>s.m.</b> de rengraziamont dles fam. Rigo, Matlogn  <b>s.m.</b> de rengraziamont dla sajun da d'invern do ent. de chi dai lifc  <b>s.m.</b> por †† Herbert Morlang y Maria Pedevilla ved. Morlang, Parü  <b>s.m.</b> por les Püres Armes</p>	
<b>Ded 09.</b>	<i>Beatus, Tareja</i>	
07:30	<i>s.m. a Antermeia</i>	
<b>Dem 10.</b>	<i>Jan da Ávila</i>	
<b>Jöb 11.</b>	<i>Walter, Iachin</i>	
07:30	<i>s.m. a Rina</i>	
→ 19:30	<b>funziun de ma</b>	
<b>Ven 12.</b>	<i>Pancraz, Nereus y Achilleus, Imelda</i>	
07:20	<i>s.m. a Al Plan</i>	
<b>Sab 13.</b>	<i>memoria de Santa Maria da Fatima, Servaz</i>	
07:30	<p><b>s.m.</b> por i mituns y les mitans co vá ala Pröma Santa Comegnun y  söes families  <b>s.m.</b> por la pêsc te familia  <b>s.m.</b> d'aniversar por † Iuliana Maneschg Erlacher, Plaza  <b>s.m.</b> por †† Ludwig y Irene Erlacher, Plaza</p>	
→ 08:00	<b>pissia por i mituns y les mitans co vá ala Pröma Comegnun</b>	
18:00	<i>s.m. prefestia a Al Plan</i>	
<b>DOM 14.</b>	<b>Sesta domegna de Pasca   De dla oma</b>	<i>Bonifaz, (Matia apostul)</i>
06:30	<p><b>gran messa</b> por döta la ploania <span style="float: right;"><i>oferta por la ploania</i></span>  <b>s.m.</b> por vis y †† dla fam. Erlacher de Tomele  <b>s.m.</b> por † Carlo Kehrer, Mone</p>	
10:00	<i>gran messa a Al Plan</i>	
<i>ampola:</i>	por les families Palfrader, Col	
<i>ministronc:</i>	<p>• <b>lönesc y sabeda:</b> Linda y Nadine  • <b>domegna:</b> Samuel y Jonas, Pio y Manuel</p>	

## 📖 Gejù Crist nosta strada

### **I ponsun do:**

*Nos sun cristiagn deach'i se sountiun liés ala porsona de Gejù Crist. Nosta fede é basada dandadöt sön le raport vi con el. Gejù rosserí se lascia tó pert a söa vita y s'accompagneia; chel co vá con el, é sön le der tru.*

### **I periun:**

*Bel Dio, Gejù Crist é le tru co condüj a te. Fá ch'i capiunse che nosta vita á direziun y travert, sc'i metun nosta speranza sön el co vir y regneia con te t'eternité.*

*Vesco Wilhelm Egger "Sonntagsbibel"*

## Heiliger Florian



*Guter Gott, in allen Gefahren des Lebens bist Du bei uns. Auf die Fürsprache des Hl. Florian bitten wir Dich: Gib uns den Mut des Hl. Florian, damit wir anderen helfen können.*

*Gib uns die Kraft des Hl. Florian, damit wir in schwierigen Situationen durchhalten können. Gib uns den Glauben des Hl. Florian, damit wir über den Tod hinaus hoffen können. Beschütze uns bei unseren Einsätzen für andere Menschen in Not und Gefahr. Denn du bist unser Halt und unsere Zuversicht in allen Lebenslagen. - Amen*

*Seelsorgeamt der Diözese Innsbruck*

## I simboi cristiagn cuntés ai mituns (16)

### **L'ega**



Zonza ega n'él degüna vita sön la tera. L'ega para la sei y dá vita ales porsones, ai tiers y ales plantes. Tan emportanta che l'ega é por nosta vita, tan emportant é Gejù por nos. Al dij enstes che el é l'ega via, co scinca la vita eterna. Dertan le Bato jüta le preo ega santa sora le ce dal viadú y dij: „I te baceii tal ennom dal Pere y dal Fi y dal Spirit Sant.“ Cösc desmostra che Chel Bel Dio se purificheia dla colpa, al se scinca vita nea, na vita con Gejù. Sen aldiunse pa d'el y pla familia de düc i cristiagn.

### **L'ancionsc**



Da dagnora é l'ancionsc val de prezios. Tla storia dai Trei Resc co vá a ciafé Gejù, é i pici graní de larié co tofa bun öna dles trei scincundes prezioses por Gejù (*Vangelo do San Mateo 2,11*). L'ancionsc ven porchel ma tut te dlijia dles gran festes. Le föm co tofa bun s'alza, emplesc la dlijia y enjopa ete le preo y la jont. Düc pó sontí: desche l'ancionsc é encer nos ia, ensciö s'enjopa ete l'amur de Chel Bel Dio. Tal medemo tomp é le föm co s'alza ince en segn por nostes oraziuns co va sö cuntra Chel Bel Dio.